

Headlines

1. भारत दे दौरे पर आए दा अरमीनियाई संसद दा इक शिष्टमंडल अज्ज राष्ट्रपति द्रौपदी मुर्मू होरेंगी मिलेया। दौनें मुख्य बंशकार रिश्ते गी होर निगगर बनाने दा धेइया कीता।
2. श्रीलंका दे राष्ट्रपति दिसानायके होरें आखेआ ऐ जे ओह श्रीलंका दी धरतै गी कदे बी भारत खलाफ गतिविधिं लेई इस्तेमाल नेई होन देडन।
3. राजौरी जिले च पुलसै द'ऊं संदिग्ध नशा तस्करें गी फगड़िये उंदे कब्जे शां साइडे 5 किलोग्राम हेरोइन बरामद कीती ऐ।
4. राष्ट्रपति, उपराष्ट्रपति, प्रधानमंत्री ते जम्मू-कश्मीर दे उपराज्यपाल होरें विजय दिवस दे मौके पर अज्ज 1971 दी लड़ाई दे नायकें गी श्रद्धांजलि भेंट कीती।
- 5 राष्ट्रपति, उपराष्ट्रपति, प्रधानमंत्री ते जम्मू-कश्मीर दे उपराज्यपाल होरें मशहूर तबलावादक जाकिर हुसैन हुंदी मौती पर गैहरा दुख प्रगट कीता।
- 6 मौसम विभाग ने जम्मू-कश्मीर च 21 दिसंबर तोहड़ी सुक्की ठंड दा प्रकोप जारी रौहने दी पेशनगोई कीती ऐ।

<><><><><><>

President-Murmu

अरमीनिया गणराज्य दा इक शिष्टमंडल उत्थूं दी राष्ट्रीय असेम्बली दे अध्यक्ष एलन सिमोन्यान हुंदी अगुवाई च अज्ज राष्ट्रपति भवन च राष्ट्रपति द्रौपदी मुर्मू होरेंगी मिलेआ। शिष्टमंडल दा सुआगत करदे होई राष्ट्रपति होरें भारत ते अरमीनिया बंशकार सदियें पराने सांस्कृतिक सरबंधें गी चेता करदे होई आखेआ जे अज्ज बी दौनें मुख्य बंशकार कुल संसारी सतह पर मता किश सांझा ते इक्कै जनेआ ऐ। मुर्मू होरें आखेआ जे भारत अरमीनिया च छमता निर्माण ते हुनर

विकास दे खेतर च विकास दे बक्ख-बक्ख सांझे कार्यक्रमें दे राएं योगदान दिंदे रौहने दी इच्छेआ रखदा ऐ।

<><><><><><>

India-Srilanka

भारत ते श्रीलंका नै अज्ज दोहरे टैक्स आहली बवस्था शा बचाs ते सरकारी खजाने च चोरी गी रोकने लेई समझौते दा आदान-प्रदान कीता। दवें पक्खें श्रीलंका दे सिविल सेवकें दे प्रशिक्षण ते क्षमता निर्माण उप्पर समझौता ज्ञापन दा बी आदान प्रदान कीता। दपक्खी गल्लबात मगरा नमीं दिल्ली च इनें समझौतें दा आदान-प्रदान प्रधानमंत्री नरेंद्र मोदी ते भारत जाततरा पर आए दे श्रीलंका दे राष्ट्रपति अनुरा कुमारा दिसानायकें उंदे बश्कार कीता गेआ। दवें लीडरें आपसी हितें दे मुद्दें उप्पर विचार बटांदरा कीता। अपने प्रेस बयान च प्रधानमंत्री नरेंद्र मोदी होरें इस गल्ल उप्पर खुशी जाहिर करदे होई आखेआ जे दिसा नायकें होरें राष्ट्रपति दे रूप च पैहली विदेश जातरा लेई भारत गी चुनेआ। उनें आखेआ जे एह जातरा दवें मुख्यें दे सरबन्धों च नमीं उर्जा ते गति दे संचार करा'रदी ऐ। तोआई दिसानायकें होरें अपने बयाना च गलाया जे उनें प्रधानमंत्री नरेंद्र मोदी होरें गी यकीन दोआया ऐ जे ओह श्रीलंका गी कुसा ऐसे तरीके कन्नै इस्तेमाल कन्नै भारत गी नुकसान पुज्जेआ ऐ भारत दे हितें च नेई होऐ। श्रीलंका दे राष्ट्रपति हुंदा अज्ज बड्डलै राष्ट्रपति भवन दे बेहड़े च औपचारिक स्वागत कीता गेआ। राष्ट्रपति द्रौपदी मुर्म ते प्रधानमंत्री नरेद्र मोदी होरें उंदा स्वागत कीता।

<><><><><><>

Narcotics-Smuggling

राजौरी जिले च नियंत्रण रेखा कन्नै लगदे शेर ते कनोती ग्राएं च फौज ते पुलसै इक सांझा तुपाई अभियान चलाया जिस दौरान नशीले पदार्थें दा कारोबार करने आहले द'ऊं संदिग्ध तस्करें गी गिरफ्तार करियै उंदे कब्जे शा साड्डे 5 किलो हेरोइन बरामद कीती गई। आकाशवाणी दे जिला संवाददाता शक्तिपाल शर्मा नै अधिकारिक सूत्रें दे हवाले कन्नै जानकारी दिती ऐ जे अंतरराष्ट्रीय बजारें च एहदी कीमत करोड़ें च ऐ ते इसी नशैहरा सैक्टर थमां बन्ने पार पुजाया जाना हा।

Poshan Bhi Padhai Bhi

समाज कल्याण मैहकमे आसेआ शुरू कीते गेदे अभियान पोषण बी पढ़ाई बी गी अज्ज रियासी च शुरू होआ। एह कार्यक्रम लौहके बच्चें दी खुराक गी बुनियादी शिक्षा कार्यक्रमें दे कन्नै जोड़िये चलाना ऐ तां जे उंदे जीवन च नरोई सेहत ते शिक्षा दी मजबूत बुनियाद पाई जाई सकै। इस कार्यक्रम तैहत जिले भर च 200 कोला मते प्रतिभागी सिखलाई हासल करै करदे न। एह सिखलाई 18 दिसंबर तोहड़ी जारी रौहग ते मेद ऐ जे एहदे नै बच्चें दी सेहत ते तंदरुस्ती पर सकारात्मक असर दिक्खने गी लब्बोग।

<><><><><><>

Mock-NEET

आजमाइशी तौर पर नीट दा इक मॉक टैस्ट डोडा जिले दे भद्रवाह च आयोजित कीता गेआ। इस टैस्ट दा सरिस्ता विशेष तौरा पर गरीब विद्यार्थिं लेई कीता गेआ।

<><><><><><>

Ashakari-Mela

ग्रामीण विकास ते पंचैती राज विभाग दे तैहत जम्मू कश्मीर ग्रामीण आजिविका मिशन पाससेआ आयोजित 5 रोजा आशाकारी मेला अज्ज समाप्त होई जाग। इस मेले च स्वयं सहायता समूहें कन्नै जुड़ी दिऐ सशक्त महिलाएं पाससेआ बक्ख-बक्ख उत्पादें दे 40 स्टाल लाए गेदे न। मिशन डरैक्टर डॉ. शुभारा शर्मा होरें इस मेले दे सरिस्ते उप्पर लोह पांदे होई आखेआ जे इस पैहल कन्नै महिला सशक्तिकरण गी होर मजबूती थहोग।

<><><><><><>

PM-Mann ki Baat

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “तन की बात” राएं औंदी 29 दिसम्बर गी देश विदेश च रौहने आले श्रोताएं कन्ने अपने बचार सांझे करगंन। हर म्हीने दे खीरी ऐतवारें बडलै 11 बजे प्रसारत होने आले इस कार्यक्रम दी एह 117महं किश्त होग। कार्यक्रम च शामिल कराने लेई लोक अपने बचार टोल फ्री नंबर 1800-11-7800 पर फोन करियै जां फही नरेन्द्र मोदी ऐप जां डलळवअ ओपन फोरम पर बी इस म्हीने दी 27 तरीक तगर भेजी सकदे न। मन की बात दा प्रसारण आकाशवाणी ते दूरदर्शन दे समूलचे नेटवर्क पर कीता जाग। एहदे इलावा एह प्रसारण ए.आई.आर न्यूज वेबसाइट ते न्यूज ऑन ए.आई.आर मोबाइल ऐप उपलब्ध होग। एहदे कन्नो कन्नी ए.आई.आर न्यूज, डी.डी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी एहदी लाइव स्क्रीनिंग उपलब्ध होग। आकाशवाणी दे सब्बने स्टेशनें परा मन की बात दे प्रसारण दे तुरत परैंत उत्थूं दी मकामी भाशाएं च एहदा प्रसारण बी कीता जाग।

<><><><><><>

Vijay-Revised

राष्ट्रपति द्रौपदी मुर्मू, उपराष्ट्रपति जगदीप धनखड़, प्रधानमंत्री नरेन्द्र मोदी ते रक्षा मंत्री राजनाथ सिंह होरें अज्ज 1971 आहली लड़ाई दे बहादुर सैनिकें गी श्रद्धांजलि अर्पित कीती। इक सोशल मीडिया पोस्ट च राष्ट्रपति द्रौपदी मुर्मू होरें बहादुर सैनिकें दे सर्वोच्च बलिदान गी चेत्ता करदे होई गलाया जे उंदियां कहानियां हर भारतीय गी प्रेरित करदियां न ते राष्ट्रीय गौरव दा इक स्रोत बनी दियां न। उपराष्ट्रपति जगदीप धनखड़ हारें सैनिकें दे शौर्य ते निस्वार्थ बलिदान दी सराहना कीती। प्रधानमंत्री नरेन्द्र मोदी होरें सोशल मीडिया पोस्ट च गलाया जे जवानें दी हिम्मत ते बलिदान दा सम्मान करदा ऐ जिनें इस दिन 1971 च भारत दी ऐतिहासिक जित्त च योगदान दिता हा। रक्षा मंत्री राजनाथ सिंह होरें बी नमीं दिल्ली च राष्ट्रीय युद्ध स्मारक उप्पर पुष्पांजलि अर्पित कीती।

<><><><><><>

Condolences-Zakir Hussain

राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेंद्र मोदी होरें मशहूर तबलावादक जाकिर हुसैन हुंदे पूरे होई जाने पर गैहरा दुख प्रगट कीता ऐ। जियां जे पैहले बी खबर दिती जाई चुकी दी ऐ जे जाकिर हुसैन हुंदा जंदी रातीं अमरीका च काल होई गेआ। ओह 73एं बरें दे हे। राष्ट्रपति होरें अपनी इक सोशल मीडिया पोस्ट च आखेआ जे उस्ताद जाकिर हुसैन अपनी बेमिसाल सृजनात्मकता ते तबलावादन च नमिएं अजमैशें लेई जाने जंदे न। द्रौपदी मुर्मू होरें आखेआ जे जाकिर हुसैन हुंदी मौत संगीत दी दुनिया च इक बड़ा बड़ठा नुकसान ऐ। उपराष्ट्रपति जगदीप धनखड़ होरें आखेआ जे जाकिर हुसैन होर अपने पिच्छे इक शानदार विरासत छोड़ी गेन ते भारत दी सांस्कृतिक पृष्ठभूमि च उंदी कदें नेई मिस्सने आहली छाप ऐ। प्रधानमंत्री होरें आखेआ जे जाकिर हुसैन होरें तबले दे अंतरराष्ट्रीय मंच तगर पुजाया ते लक्खें लोकें गी लैह ते ताल च बन्निए रक्खेआ। प्रधानमंत्री होरें अगगे आखेआ जे उंदी शानदार उपलब्धियां ते कम्म औने आहिलयें केइएं पीढ़िएं गी प्रेरित करदियां रौहडन। जम्मू-कश्मीर दे उपराज्यपाल मनोज सिन्हा होरें बी जाकिर हुसैन हुंदी मौती पर दुख प्रगट करदे होई आखेआ जे उंदे नेई रौहने कन्नै देसै संगीत दी दुनिया दी इक कद्दावर हस्ती गी मोआई दिता ऐ।

<><><><><><><>

Vijay

1971 दी लड़ाई च पाकिस्तान पर भारत दी शानदार जित दे चेते च अज्ज पूरा मुख विजय दिवस मना करदा ऐ। इस लड़ाई दरान अपनी जिंदू दा बलिदान देने आलें गी अज्ज श्रद्धांजलि बी दिती जा'रदी ऐ। 1971 च अज्जै दे रोज पाकिस्तान दे लैफ्टिनेंट जनरल ए.ए.खान नियाजी नै अपने 93 ज्हार सैनिकें कन्नै भारती फौज ते मुक्ति वाहिनी दे सामने आत्म समर्पण कीता हा। विजय दिवस दे उपलक्ष्य उप्पर राष्ट्रपति द्रौपदी मुर्मू होरें आर्मी हाउस च आयोजित इक कार्यक्रम च हिस्सा लैता।

<><><><><><><>

Vijay-Udhampur

अज्ज विजय दिवस दे मौके पर उधमपुर च मेजर नारायण सिंह चौक दे श्रद्धांजलि स्थल च बी इक कार्यक्रम दा सरिस्ता कीता गेआ। बक्ख-बक्ख संगठनें फौजियें दे कल्याणकारी संगठन सीनियर सिटीजन क्लब उधमपुर, बपार मंडल उधमपुर, सेवा भारती उधमपुर, तुषार महाजन ट्रस्ट ते बक्ख-बक्ख कालर्जे ते स्कूलें इस कार्यक्रम च शिरकत कीती। प्रोग्राम दी शुरूआत शहीद सैनिकें गी श्रद्धा-सुमन अर्पित करने कन्नै होई। एहदे मगरा बक्ख-बक्ख स्कूलें दे विद्यार्थियें सांस्कृतिक कार्यक्रम पेश कीते।

<><><><><><>

DC-Poonch

पुंछ दे डिप्टी कमीशनर विकास कुंडल होरें कल इक समीक्षा बैठक लाइयै जिले च राशन कार्ड दी ई-केवाईसी ते खुराक सिविल सप्लाई ते उपभोक्ता मामले सरबन्धी विभाग दिएं होरने योजनाएं तैहत हासल प्रगति दा आंकलन कीता। उनें हर इक तैहसील थमां ई-केवाईसी रिपोर्ट दा जायजा लैता ते सब्बने तैहसील सप्लाई अफसरें पर जोर पाया जे ओह अपने अखितयार हेठ ओने आले इलाके च 100 फीसद लाभार्थिं दा ई-केवाईसी पंजीकरण जकीनी बनान। डिप्टी कमीशनर होरें आधार गी राशन कार्ड कन्नै जोड़ने, बालाकोट च सरकारी खद्य भंडार दे निर्माण अमले दी मौजूदा स्थिति ते मलाजमें कन्नै सरबन्धत होर केई मसलें दा बी जायजा लैता।

<><><><><><>

Cricket

भारत ते आस्ट्रेलिया बश्कार ब्रिस्बेन दे गाबा स्टेडियम च खेड़ जा'रदे मजूदा श्रृंखला दे त्रीए टैस्ट मैच दे अज्ज त्रीए ध्याड़े दा खेड़ मुक्कने तगर भारत नै अपनी पैहली पारी च 4 विकटें दे नुकसान पर 51 रन्ज बनाई लैते दे हे। एहदे शा पैहले मेजबान आस्ट्रेलिया दी पूरी टीम अपनी पैहली पारी च 445 रन्ज बनाइयै आउट होई गेई। भारतीय गेंदबाज जस्प्रीत बुमराह नै 6 ते मोहम्मद सिराज नै आस्ट्रेलिया दे 2 खडारी आउट कीते। जिस्सलै जे नितीश रेड्डी ते आकाशदीप नै 1-

1 विकट हासल कीती। 5एं मैचें दी इस श्रृंखला च अजें तगर दौनें टीमें 1-1 मैच जित्ते दा ऐ ते दवै बरोबरी पर बने देन।

<><><><><><>

Weather

उत्तर भारत दे होरनें केई हिस्से आडर गै जम्मू-कश्मीर च सुक्की ठंडू दा प्रकोप बरोबर जारी ऐ। जम्मू-कश्मीर च रातीं दे तापमान च बड़ी तेजिया कन्ने गिरावट आई ऐ। मौसम विभाग नै 21 दिसंबर तोहड़ी मौसम आम तौरा पर खुश्क बने दे रौहने दी पेशगोई कीती ऐ। प्रदेश दे उप्परले पहाड़ी इलाकें च ताजा बर्फबारी दे बाद सीत होर बधी गेदा ऐ ते बर्फ पेदी होने कारण गड्डिएं दी आओजाई च बी कठिनाई आवै करदी ऐ ते यात्रिएं ते सैलानिएं गी सलाह दिती गेई ऐ जे ओह ट्रैफिक बारै जारी हिदायतें दी सख्ती नै पालमा करन। सिंथन ते मुगल रोड पर पेदी बर्फ हटाने दा कम्म जारी ऐ ते उत्थे सड़कें दे रख-रखाव लेई जिम्मेदार एजेंसिएं आसेआ इजाजत थोने दे बाद गै उत्थे गड्डिएं गी जाने दी इजाजत दिती जाग।

<><><><><><>